

Bergen, 18.02.22

Vår ref: 2022/221
Sakshandsamar: Eirin Kongestøl Espeland

Dykkar ref: 22/455

Fiskeridirektoratet region Vest

Alver, Gjerdneset – klarering ny lokalitet – uttale

Viser til brev av 24.01.22 med vedlegg, frå Fiskeridirektoratet region Vest om ovannemnde sak.

Fiskarlaget Vest har sendt saka til Nordhordland Fiskarlag.

Generelle merknader

Fiskarlaget Vest registrerer at ein får mange søknadar om endring av lokalitetar, auka biomasse på eksisterande lokalitetar, samt søknadar om nye lokalitetar. Mange meiner at eitt lite enkelt prosjekt ikkje kan skade, men mange nok avgrensar tilgjengeleg areal for fiske bit for bit. Det er viktig at forholda blir lagt til rette slik at norske fiskarar fortsatt kan skape verdiar av fiske for spesielt kystsamfunna våre. «Sjøvern» er like viktig for fiskerinæringa, som «jordvern» for jordbruk.

Styresmaktene må ikkje føre bit-for-bit-politikk. Ein må vurdere heilheitlege effektar og kva eit større område toler av akvakultur, i tillegg til anna utslepp til sjø. Styresmaktene må definere kva som er akseptabel negativ innverknad på anna næring.

Akvakulturnæringa må velje gode lokalitetar som ikkje er i konflikt med andre næringar, slik at ein ikkje forureinar eit område for deretter søkje om ny/justert plass. Ein må **unngå** både **arealkonflikt** og forureining/negativ påverknad på **viktige økosystem og fiskeriområde**.

Akvakulturnæringa må vere bevisst på bruken av midlar til avlusing og sjukdomsbehandling. Det er påvist at kjemiske midlar mot lakselus òg har negativ innverknad på marine krepssdyr: <https://www.hi.no/hi/temasider/arter/lakselus/miljoeffekter-av-lakselusmidler> . Desse effektane kan òg indirekte ha innverknad på andre artar i form av svekking av økosystem.



Ein registrerer at det er forskning på alternativ lusebekjemping utan bruk at kjemiske midlar. Det er derimot viktig at ein igjen ser dei heilheitlege effektane. Ein må vere bevisst på anna typar forureining som til dels lyd- og lysforureining, som kan påverke vandrings- og åtferdsmønster til sjøartar.

Akvakulturnæringa må sørgje for at arealbeslaget på sjøbotn, i form av fortøyingar, blir avgrensa mest mogleg. Ein ynskjer å peike på at bolting (ikkje boltar som fiskereiskap kan hefte i) kan avgrense ankringsområdet.

Det er viktig at akvakulturlokalitetar og tilhøyrande fortøyingar/fester som ikkje er i bruk, blir fjerna. Med dagens fokus på plastforureining i sjø må ein òg førebyggje mest mogleg. Det kan vere dyrt og vanskeleg å rydde opp i ettertid.

Gjerdneset

Det blir søkt om klaring av ny lokalitet med maksimal tillaten biomasse på 3120 tonn. Omsøkt anlegg er tenkt å bestå av seks merdar med flytekrage på inntil 200 meter omkrets. Total lengde og bredde vil vere 660 x 110 meter, med totalt arealbeslag på 72 dekar.

I føresegnene til tidlegare Meland kommune sin kommuneplan står følgjande om aktuelt område for akvakultur under punkt 3.3.6 *kombinerte føremål i sjø og vassdrag*:

«Inngrep eller tiltak skal vurderast som enkeltsaker, dei kombinerte føremåla gjeld likestilt der anna ikkje er nemnd.

- *FEFIKFR-2 tiltak eller inngrep kan ikkje tillast på stader som kjme i konflikt med fiske, ferdsel, friluftsliv eller akvakulturinteressar. Skjeld og skaldyrannlegg kan tillast dersom dei ikkje er til hinder for almenne interessar.»*

Det er i Fiskeridirektoratet sitt kartverkøy registrert reketrålfelt, gyteområde for torsk, samt fleire kaste- og låssettingsplassar (indikerar notfiske) i nærleiken. Det blir òg fiska i område som ikkje er registrert. Området blir m.a. brukt til fiske etter sjøkreps og breiflabb.

Ein visar til vår uttale av 07.01.22 til søknad om etablering av ny lokalitet, Skjelanger, i område vest av Gjerdneset:

«Eksisterande lokalitet Toska S har fått løyve til å flytte lenger sør i Mangersfjorden. Lokaliteten inkludert fortøyingar beslaglegg, saman med andre lokalitetar i området, store areal som har vore nytta til fiske. Dette gjer at yrkesfiskarane må nytte andre areal til fiske. Ein kan opplyse om at det i omsøkt område blir drive fiske etter sjøkreps, breiflabb og brosme med m.a. teiner og garn, i tillegg til anna fiske.

I tillegg vil ein opplyse om at området blir brukt som «notvaskeplass» i tilknytning til notbøteriet ved Manger. Ytterlegare arealbeslag frå eit nytt akvakulturanlegg vil kunne øydelegge vidare bruk av området til vask av not.

Ein visar til dei generelle merknadane i høve heilheitleg planlegging og at ein ser større område under eitt (òg på tvers av kommunegrensar) ved vurdering av verksemd og tiltak i sjø. Det må i kvar enkelt sak bli tatt ei vurdering av både akseptabel total arealbeslag i område og verknad på miljø. Fiskarlaget Vest er svært skeptisk til etablering av eit nytt akvakulturanlegg i eit område kor det allereie er etablert fleire akvakulturanlegg, samt at det er fleire tersklar i nærliggande område. Ein er spesielt uroa for, i tillegg til arealbruken, innverknaden av utslepp frå anlegga og risiko for sjukdomsspreiing, og dermed auka bruk av legemiddel som kan ha negativ effekt på økosystemet i sjø. I tillegg er det viktig å unngå utslepp ved rekestrålfelt (naturgjevne område).

Fiskerinæringa er basert på fornybar biologisk produksjon, og er difor avhengig av eit reint og produktivt kyst- og havmiljø mest mogeleg fritt for miljøgifter, framandstoff og legemiddel. Ein har eit stort felles ansvar, både nasjonalt og internasjonalt, for å oppretthalde eit reint og produktivt hav. Det er avgjerande for kvalitet, omdøme og marknadsverdi for norsk sjømat. Det er viktig å førebyggje då det ofte er vanskeleg og dyrt å rydde opp i ettertid.

Fiskarlaget Vest meiner at aktørane må ta vare på og utnytte eksisterande tildelte areal. Om det i tillegg er behov for utviding meiner ein at det mest sannsynleg vil vere til mindre ulempe for utøving av yrkesfiske om ein vurderer mindre utviding ved eksisterande anlegg kontra å beslagleggje eit av få område som er fritt for fortøyingar og akvakulturanlegg. Ein forutset at ein får slike saker til høyring med gode kart over eksisterande situasjon og omsøkt endring.

Med bakgrunn i ovannemnde går Fiskarlaget Vest i mot nyetablering i området.»

For fiskerinæringa er det viktig at ein ikkje kun ser enkeltsaker, men at ein tar ei heilheitleg vurdering av eksisterande og omsøkte lokalitetar i området og kva effektar dette vil ha for det marine liv og framtidig fiskeri i området. Dei to nye anlegga som er omsøkt, samt eksisterande anlegg med fortøyingar vil beslagleggje store areal og fortrengje yrkesfiske.


Med helsing
Fiskarlaget Vest

Britt Sæle Instebo
Dagleg leiar


Eirin Kongestøl Espeland
Rådgjevar

Kopi pr. mail: Nordhordland Fiskarlag, Alver kommune
Statsforvaltaren i Vestland, Vestland Fylkeskommune

Brevet er godkjent elektronisk og blir sendt utan handskriven underskrift.



Utsnitt Fiskeridirektoratet sitt kartverktøy



Utsnitt søknadskart